



D'Sydiane.

Fasnacht 1925.

D'Miss Mortis macht e Todessprung
Z'Midag am Zwelfi zäh,
Und wo sie sott vom Globus us
Derzue e-n-Arang näh,
Kunnt 's Publikum in schnällem Lauf;
Doch z'gseh git's gar nyt ass e-n-Usverkauf.

D'Alhambra bringt e Kenigsfilm;
Der Wieser, dä wird wyss
Vor Wuet und macht im „Vorwärts“ drum
E ganz mainaidig Gsch...!
Goht's anderscht nit und macht's di froh.
So kasch jo Märliprinze kepfe loh.

E Bandwurm wird us unserer
Theaterlotterie;
's Gäld usgäh tien sie scho derfir,
Nur nämme sie nyt y.
Will's nimme zieh, so kennt me-n-au
E Hypothek näh uff d'Theatersau.

Am Tag vo der heilige Barbara,
Do schiesst me-n-iber der Rhy.
Und sticht in's Bolschewikihärz
Im Horburg vis-à-vis.
Die schwieligi Fuschit erhebt Protäschit,
Will scho am Säxi sie wird gschteert im Näscht.

Wottschi hitte-n-iber d'Wettstaibruck,
So muesch 's rächt Trottoir näh;
Gohsch links, so kasch im Polizischt
Zuer Schtrof e Fränkli gäh.
Und alles nur — i mach e Wett! —
Will d'Polizei e F... im Hirni het.

Der Kunschtverain, dä het der Stadt
E-n-Amazone g'schänkt;
Fascht glycht sie im e Zuluwyb,
's link Bai, das isch verränkt.
Dur d'Stadt wird g'föhrt sie hin und här,
Fir z'luege, weele Platz z'verkaibe wär.

Die Fasnacht wär kai Teifel wärt,
Wenn's Fasnachtskomite
Sich nit mit syne Zwätschgekepf
Am Stänebärg liesst' gseh.
Sprit hän sie kain, derfir der Gips;
Fasnächtlig infiziert sie als der Bips.

Santjakobfescht! Kanoneschitz!
Bym fimfte haltet's a.
D'Kanone haig schynt's, wie me sait,
E-n-Art Verstopfig gha.
Drum Kanonier, wenn schlechti Witz
Ihr wän vermyde, so laxieret's G'schitz!

Der „Vorwärts“ wirft im Bummi vor,
Er syg kai Sozialischt,
Will in der „alte Klappe“-n-er
Setz ab sy Bourgeoisimisch.
„Viel lieber“, sait der Bummika,
„E-n-alti ass e dummi Klappe ha“.

Wenn ain e leeri Kirche het,
Suecht er dur dinn und dick,
Ob nit dur Nudidäte werd
Verteiflet 's Jugendglick.
Seht Sauereie-n-iberal
Und macht vor G'richt derno e Mordsskandal.

Der Stainer baut in Dornach uss
E Kische, 's isch e Grus;
's isch wie mit syner Wisseschaft,
Es kunnt kai Sau meh drus.
Sogar d'W.-C. gän Rätsel uff,
Eurythmisch, ka me numme pf.... druff.